


ADVERTISSEMENT QVE METTENT ET  
 baillent pardeuant vous Nosseigneurs tenans la Cour de Par-  
 lement, les Conseillers de l'Hostel de cette Ville de Paris,  
 demandeurs en Reglement, suiuant les Requestes par eux pre-  
 sentées à ladite Cour les 3. May 1646. & 19. Nouembre 1648. &  
 suiuant les demandes par eux fournies au desir d'icelles le 19.  
 Avril 1649.

*Contre les Preuost des Marchands & Escheuins de cette Ville de Paris,  
 defendeurs.*



ENDANT à ce que pour les raisons & moyens cy-apres  
 déduits, il soit dit, s'il plaist à la Cour, ayant égard aus-  
 dites Requestes & icelles entherinant, Que lesdits Con-  
 seillers de Ville seront maintenus & gardez en la fon-  
 ction, exercice & pouuoir de leurs Charges, à eux at-  
 tribuez par les Edicts de Creation & de Confirmation  
 d'iceux, & en ce faisant ayant égard ausdites demandes

& y faisant droit, que

Pour éuiter aux abus qui se commettent en la distribution du bois & du  
 charbon, & empescher les exactions que font les Marchands, au preiudice  
 du peuple; Qu'incontinent apres l'eslection des Preuost des Marchands &  
 Escheuins, assemblée sera faite du Conseil de la Ville, pour faire Regle-  
 ment sur chacune qualité de bois & charbon, & de ce que les Debardeurs,  
 Chargeurs, Crocheteurs & Chartiers deuront prendre pour chacune voye,  
 & meisme pour ce qui est du charbon; Que ledit Reglement sera affiché par  
 placart sur Fer blanc à chacun des Ports de ladite Ville, pour estre connu  
 à vn chacun: Et pour cét effet qu'assemblée sera faite au premier iour qu'il  
 plaira à la Cour ordonner.

Qu'il sera deputé par chacune semaine deux des Conseillers de ladite  
 Ville, tour à tour, qui seront nommés par lesdits Conseillers, pour se  
 transporter esdits Ports & prendre garde que ledit Reglement soit obserué  
 & entretenu, dont en cas de contrauention ils dresseront leur Procez ver-  
 bal pour estre iugé avec lesdits Conseillers de Ville.

Que lors qu'il sera fait renuoy auidits Preuost des Marchands & Esche-



ains par le Conseil du Roy, Cour de Parlement, Chambre des Comptes & Cour des Aydes, il ne pourra estre deliberé sur lesdits renuoyz que les Conseillers de la Ville ne soient assemblez, pour avec lesdits Preuost des Marchands & Escheuins estre deliberé & resolu, comme il se pratique en toutes les Villes de France où il y a Preuost des Marchands, Maire & Escheuins.

Qu'auant qu'ordonner l'ouuerture des quartiers des Rentes, comme il a tousiours esté pratiqué par le passé, ils soient tenus d'assembler le Conseil de la Ville, pour le resoudre avec connoissance de cause.

Qu'il leur soit fait defences de faire aucun traité ou recouurement des assignations à eux données pour le payement des Rentes, sinon en l'assemblée desdits Conseillers, pour éuiter au grand prejudice & dommage que le Peuple en a receu és années 44. 45. & 46.

Qu'il leur soit fait aussi defences d'arrester aucun compte avec les Receueurs & Payeurs desdites Rentes, sinon en presence desdits Conseillers ou de bon nombre d'entr'eux, deputez par lesdits Conseillers: Lequel arresté de compte sera représenté au Conseil de la Ville pour estre agréé, s'il est trouué à propos, le tout à peine de nullité.

Qu'une fois le mois, pour le moins, ils soient tenus d'assembler le Conseil de la Ville, pour leur représenter & faire entendre ce qui c'est passé pour le fait de ladite Police de la Ville, & principalement des Rentes, qui est la principale fonction des Preuost des Marchands & Escheuins, pour le grand nombre de personnes qui y sont interessées.

Que pour éuiter aux desordres qui se passent au payement & distribution des arrerages des Rentes, qui se doit faire au Bureau de la Ville, où les Receueurs & Payeurs au lieu d'apporter ce qu'ils doiuent par chacune semaine, n'apportent pas le plus souuent le tiers de ce qu'ils doiuent apporter, qu'ils distribuent à personnes interposées & viennent tard au Bureau; Il soit député par chacun iour de payement & par chacune semaine deux desdits Conseillers, qui seront par eux deputez pour assister aux Bureaux des payemens, pour voir & verifier si lesdits Receueurs & Payeurs apportent les sommes qu'ils sont tenus apporter, pour estre en leur presence distribuées au Peuple incessamment, & s'il y a du manque en faire leur rapport.

Que l'Arrest du Conseil du Roy du jour de par lequel il est ordonné que pour les abus qui s'estoient reconus és comptes precedens, que les quatre anciens Conseillers de Ville assisteront à l'examen du compte du Domaine de la Ville, que ledit Arrest soit executé, & en ce faisant que ledit compte ne puisse estre examiné, sinon en la presence des quatre anciens des Conseillers de ladite Ville, à peine de nullité de l'examen d'iceluy.



Et pour ce qui est du compte des octroys, que l'estat n'en puisse aussi estre arresté, sinon en presence des quatre anciens Conseillers de ladite Ville, attendu que la recepte & despenſe dudit compte est de plus grande importance que celle du compte du Domaine de la Ville.

Que pour éviter aux monopolles & pots de vin qui se donnent lors du renouvellement des Baux des maisons du Pont nostre Dame, celles du Petit Pont, Marché neuf & autres du Domaine & Patrimoine de la Ville, lesdits Baux soient faits comme ils ont esté faits par le passé, en presence desdits Conseillers de la Ville pour ce assemblez, au plus offrant & dernier encherisseur, à l'extinction de la chandelle.

Deux desdits Conseillers, & par eux deputez, soient tenus & obligez d'aller par semaine tour à tour, aux Audiences de la Ville, où ils prendront leur rang & seance qu'ils ont accoustumé de prendre quand le Conseil de la Ville est assemble.

Que lors qu'il sera delibéré audit Hostel de Ville en presence desdits Conseillers, la delibération & resultat sera signé du plus ancien des Conseillers qui se trouvera lors d'icelle, afin qu'il n'y puisse estre changé, & sera leu à la premiere assemblée qui se fera avant que delibérer & passer outre à aucune delibération.

Tout ce que dessus pour semaintenir en l'exercice & fonction de leurs Charges, comme ont fait cy-devant leurs predecesseurs pour le service du Roy & du Public, sans pretendre aucuns gages, taxes & salaires, en quelque sorte & maniere que ce soit, à quoy ils renoncent.

*Addition aux demandes faites par les Conseillers de Ville de Paris en  
Reglement, contre Messieurs les Preuost des Marchands  
& Escheuins d'icelle.*

**Q**UE sur ce que lesdits Conseillers ont appris que lesdits sieurs Preuost des Marchands & Escheuins auroient emprunté plusieurs sommes de deniers pour faire des remboursemens à quelques Particuliers Detempteurs d'heritages appartenans à ladite Ville, sans avoir sur ce pris l'aduis & consentement desdits Conseillers, il leur soit fait defenses d'emprunter aucuns deniers pour quelque cause & pretexte que ce soit, mesmement pour faire des acquisitions necessaires pour les fortifications, ornement, commodité & vtilité de ladite Ville, acquit & amortissement des Rentes que doit ladite Ville, faire des reparations aussi necessaires aux maisons, ponts, quais, portes, murailles & fontaines d'icelle, sans au prealable assembler le Conseil de ladite Ville & estre delibéré des sommes qu'il conuiendra emprunter, à peine de nullité desdits emprunts.



Comme aussi defences seront faites ausdits sieurs Preuost des Marchands & Escheuins de vendre, alier, eschanger ou engager à prix d'argent, ou à condition de cens & rentes, baux emphyteoses, le fonds, Domaine & Patrimoine de la Ville, cens & rentes, droicts & reuenus d'icelle, s'il n'en est deliberé avec eux & ledit Conseil de Ville, à peine de nullité desdits actes & de respondre desdites alienations en leurs propres & priuez noms.

Que lesdits sieurs Preuost des Marchands & Escheuins ne pourront faire aucuns traitez & marchez avec Massons, Charpentiers & Entrepreneurs d'ourages de plus de la somme de Cinq cens liures tournois, sans assembler ledit Conseil de la Ville; en presence desquels seront conclus & arrestez lesdits marchez, & les ourages en consequence seront visitez, évaluez & receus conjointement avec lesdits sieurs Preuost des Marchands & Escheuins par les quatre Commissaires deputez du Corps desdits Conseillers, pour le regime, gouuernement & administration du Domaine de ladite Ville, comme estans naturellement Controlleurs des deniers & bastimens d'icelle, à peine de nullité desdits marchez.

Et d'autant que lesdits Conseillers ont esté aduertis que depuis peu de temps que lesdits sieurs Preuost des Marchands & Escheuins auroient escrit à nostre S. P. le Pape, sur quelque affaire de consequence, sans en auoir communiqué audit Conseil de la Ville, il leur soit fait defences de plus s'ingerer à l'aduenir de rendre & faire response en chose de consequence, soit au Pape, Princes, Cours, Estats & Communautéz, sans le Conseil de la Ville: auquel ils sont tenus de communiquer leurs Lettres & Missiues, comme eût vne chose de tres grande importance au Roy, à l'Estat & à ladite Ville.

A ces fins disent les demandeurs qu'estant vne des parties essentielles de la Preuosté des Marchands, creés & institués par le mesme Edict de creation de ladite Preuosté, qui dès l'année 1190. fut establie par Philippes Auguste, mais avec vne Iurisdiction bien plus ample qu'elle n'est pas à present: car elle estoit en possession de l'Agoronomie, qui est à present la justice des Iuges Consuls, qui connoist de toutes sortes de commerce & marchandises en general, comme aussi de l'Astinomie & menuë Police de la Ville, & de ces Iurdictions, elle a pris son nom de Preuosté des Marchands; Mais Charles Quint la reforma de beaucoup, renfermant cette Iurisdiction en la connoissance de la Marchandise qui arriue entre les quatre Tours. Si bien que ce n'estoit pas sans raison qu'il estoit necessaire de créer le Conseil de la Ville, à cause du grand nombre d'affaires qui se presentent journellement, dont l'employ, l'exercice & le ministere estoit de conseiller les faits & affaires de ladite Ville, & les plus grandes & importantes d'icelle: & en ce faisant rendre la justice distributiue & commutatiue conjointement avec lesdits Preuost des Marchands & Escheuins, à l'instar des



autres Jurisdiccions; Et en outre de vaquer generally à tout ce qui concerne ladite Ville, comme d'assister à toutes les ceremonies, d'entendre & ouyr les comptes du Domaine & Patrimoine de la Ville, regler la despense des bastimens, recevoir des Officiers de la Milice & Police de ladite Ville, auoir soin des eauës & entretenement des fontaines, assister aux adjudications des Baux des maisons du Pont nostre-Dame, Petit-pont & autres lieux appartenans à icelle, aux Reglemens pour le bois & charbon, bleds, vins, emprunts de deniers, creation de rentes sur les Tailles, Gabelles, Aydes, Clergé, Receptes generales & autres. Bref, de connoistre de toutes choses importantes & necessaires pour l'administration, police, manutention, augmentation, defense & conseruation de cette grande & populeuse Ville; ce qui se iustificiera par les Registres del' Hostel de Ville, en quoy consiste leur pouuoir & exercice: Auquel exercice ayant esté troublez, méprisez & empeschez par lesdits Preuost & Escheuins par vne contrauention manifeste aux Edicts & Ordonnances & contre l'vsage, au grand prejudice du Public & des demandeurs: desquels les Offices, Charges & honneurs seroient rendus illusoires, & pour le bien public ils ont esté neceffitez de se pouruoir en ladite Cour, & de presenter les Requestes de l'entherinement desquelles il est question, & conformément à icelles de fournir leurs demandes afin de Reglement, à quoy ils ont satisfait suiuant les Conclusions prises par Monsieur le Procureur General, estant au bas desdites Requestes, dont & desdites demandes, fins & conclusions, ils ont fait bailler copie aux defendeurs.

Contre lesquelles Requestes & demandes lesdits defendeurs ont fourny de defenses pardeuant Monsieur Conseiller en la Cour, Commis pour ouyr & regler les parties: en suite de quoy elles ont esté par luy appointées en droit à escrire par aduertissement & produire.

Satisfaisant auquel appointment, soustiennent les demandeurs qu'ils sont receuables & bien fondez en leursdites Requestes, demandes, fins & conclusions, pour plusieurs raisons.

La premiere, qu'ils justifieront & feront voir que par l'Ordonnance sur la forme & eslection des Preuost des Marchands & Escheuins & des Conseillers d'icelle, contenuë au chapitre 58. du Registre des Ordonnances de la Ville fol. 192. qui est le plus ancien tiltre qu'ont à present lesdits Preuost des Marchands, Escheuins & Conseillers de Ville, ceux de leur creation estant perdus par le malheur des temps & des mutations que les guerres ont apporté à ladite Ville: Lesquelles Ordonnances font mention & font voir qu'il y en a eu de plus anciennes, sur lesquelles elles ont esté dressées, qui sont, avec les Edicts cy-apres mentionnez, les pieces fondamentales & decisives des pretentions desdits demandeurs, dont la teneur ensuit.



Ordonnances faites sur la forme & maniere de l'election des Preuost des Marchands & Escheuins de ladite Ville, & des Conseillers ordinaires d'icelle en ladite Preuosté, icelles Ordonnances faites en l'Hostel de ladite Ville le Samedi 25. iour de Iuillet l'an 1450. ensuiuant l'ordre & forme anciennement vstée, & en corrigeant certaines Ordonnances qui du temps des guerres & diuisions de ce Royaume, c'est à sçauoir en l'an 1431. auoient esté faites sur la forme de ladite election.

Si bien que la Cour considerera, s'il luy plaist, que les demandeurs estans appelez par ladite Ordonnance Conseillers ordinaires de la Ville de Paris, c'est ce qui fait voir clairement qu'estans Conseillers ordinaires, ils sont bien fondez en leurs pretentions: au moyen dequoy, ils doiuent auoir connoissance de tout ce qui se passe dans la Iurisdiction de ladite Preuosté, l'energie & la force de ce mot Ordinaires, signifie vne habitude qui est vne qualité permanente, directe, stable, réglée & necessaire, qui leur attribue la faculté de connoistre & de donner conseil en toutes les affaires generalement quelconques dudit Hostel de la Ville, tant ordinaires qu'extraordinaires, grandes & petites, ce qui est aisé de prouuer par la definition mesme de ce mot ordinaires, qui en marque la nature & l'essence; *Index ordinarius est qui iurisdictionem iure suo non alieno beneficio habet, vel ex sententia Iulianiani, vel Papiniani, is dicitur qui natiuam non datiuam modo iurisdictionem habet, hoc est qui eam iure Magistratus, non mandato speciali obtinet.* Et partant que leur fonction & ministere ne depend point de la discretion ny du caprice desdits Preuost des Marchands & Escheuins, comme ils pretendent par leurs pretenduës responses aux demandes desdits demandeurs.

La seconde raison est establie sur ce que par l'article XI. desdites mesmes Ordonnances sur ladite electiō cy dessus mentionnée, il est dit en ces termes.

Et pour conseiller les faits & affaires de ladite Ville, y aura d'oresnauant vingt-quatre Conseillers, & non plus, qui feront serment de loyaument conseiller les faits & affaires de ladite Ville, & seront tenus de venir & comparoir au Conseil de ladite Ville toutesfois qu'ils y seront appelez.

Ce qui fait voir clairement que lesdits Conseillers sont instituez pour conseiller les faits & affaires de ladite Ville indefiniment sans restriction ny reserve; Car si ce n'eust esté l'intention de ladite Ordonnance, il auroit esté specifié par icelle quelles sortes d'affaires, auroient determiné la fonction & ministere desdits Conseillers; mais expliquant icelle Ordonnance par ces termes de conseiller, les faits, il faut entendre toutes les entreprises, fonctions, actions & operations, *id est actiones & functiones* que sont tenus de faire lesdits Preuost des Marchands & Escheuins en cette qualité, & par ce mot, conseiller les affaires, c'est à dire vaquer avec eux à juger les pro-



cez, decider toutes les affaires & differends des parties : & lesquels deux termes, de faits & affaires, renfermēt en soy tout ce qui se gere & administre audit Hostel de la Ville : & expliquant ces mots, qu'ils seront tenus de venir & comparoir au Conseil de ladite Ville toutesfois qu'ils y seront appelez ; ce sont termes qui sont relatifs aux Conseillers ordinaires, & qui sont des conditions obligatoires & non prohibitiues, par lesquelles ils sont obligez necessairement de comparoir à tous les mandemens des Preuost des Marchands & Escheuins, qui sont par la mesme raison obligez de les mander & appeller à tous les faits & affaires de ladite Ville, & cette clause est quasi semblable à celle des Senateurs Romains, mais moins seuer, qui estoient mulctez s'ils manquoient aux commandemens des Consuls, *Ceterum summam quam penderent Senatores, si reipublicæ Consilijs nollent, adesse legibus, credo fuisse præfinitam etenim Dio prodidit Augustum, cum unus omnia teneret, has multas ampliassse multabantur vero non solum si abessent verum etiam si venissent tardius.* Car pour lors de ladite Ordonnance les assemblées del' Hostel de Ville, ny les jours que l'on tenoit l'Audience n'estoient point reglez.

La troisieme raison est tirée de ce que par l'Edict du Roy Henry II. du mois de May de l'année 1554. pour l'ordre de l'election des Preuost des Marchands & Escheuins de la bonne Ville de Paris, verifié en Parlement le 20. Aoust ensuiuant, estant au feuillet 319. du Registre des Ordonnances de la Ville, il est dit en termes exprés,

Que les Conseillers de nostredite Ville, qui sont vingt-quatre en nombre, lesquels ont le serment de donner conseil pour les affaires de nostredite Ville & les plus grandes & importantes d'icelle, seront d'oresnauant composez : à sçauoir, dix de nos Officiers Presidens de nos Cours, Maistres des Requestes, Conseillers, Maistres de nos Comptes, Auditeurs d'icelles, nos Notaires & Secretaires, & autres Officiers ayant le serment à nous, sept notables Bourgeois de nostredite Ville de Paris, demeurans & residans actuellement en icelle, ne faisant aucun train ne trafic de marchandise, vivant de leurs rentes & reuenus, & les autres sept, faisant le parfait des vingt-quatre Marchands non mecaniques, demeurans aussi & residans en nostredite Ville & y faisant actuellement train de marchandise : tellement qu'aduenant la vacation de l'un desdits Estats & Offices, Voulons qu'au lieu de l'un de nosdits Officiers, il sera pourueu d'un qui sera pareillement de nos Officiers de la qualité dessusdite qui aura serment à nous, & au lieu d'un Bourgeois un Bourgeois, & d'un Marchand un Marchand, les reduisant & remettant à l'aduenir en la maniere dessusdite.

Si bien qu'il y a deux grandes considerations en cēt Edict, qui sont comme deux lumieres, capables d'esclairer la justice de la cause des demandeurs.



La première considération, qui est l'intention du Prince dans la disposition de cét Edict, qui comme vn sage Legislatteur a voulu former vn Conseil des plus excellentes parties des ordres de cette grande Ville, & comme vn abbregé d'icelles, à l'exemple du Senat Romain, qui estoit remply de trois genres de personnes, comme dit Isidore, tous decorez, de pareil nom & nommés Senateurs : Toutesfois plus ou moins honorés selon leurs âges, & qu'ils estoient encores employés en plus grandes Charges, les premiers estoient appellés *Illustrißimi*; les seconds, *Speßtabiles*; les troisißemes, *Clarißimi*; ce qui à vne grande analogie, rapport, & s'ajuste extremément bien avec les trois estages de personnes qui composent le Conseil de la Ville. Car ces *Illustrißimi*, sont fort bien representés par Messieurs les Conseillers de Ville, Officiers de Cours Souueraines, qui sont les veritables ornemens, l'œil, l'ame & la perfection de cette Compagnie; Ces *Speßtabiles*, par ces notables Bourgeois & *melioris notæ*, viuans de leurs Rentes & reuenus; & ces *Clarißimi*, par ces honorables Marchands dont le credit, reputation & bonne conduite les fait connoistre & porte leur reputation par toute la Terre. De sorte que cette belle preuoyance tout à fait Royale, auroit esté assés inutile dans l'establisement, creation & disposition de cét Edict, si ce n'estoit que ce grand Roy auroit voulu composer vn Conseil capable de connoistre & juger de toutes les affaires en general, qui se peuuent traiter en cette grande Ville: Car pour les questions de droit qui doiuent estre secourûes de la Science, des Loix & des Ordonnances, Messieurs les Officiers des Cours Souueraines sont en cette Compagnie pour en faire la decision; d'autant que les Preuost des Marchands & Escheuins ne sont obligés d'estre gradez ny d'auoir connoissance des bonnes Lettres. Et pour preuve de ce, il y auoit auparauant cét Edict vn Lieutenant des Preuost des Marchands & Escheuins gradué, comme il se voit par les Registres de ladite Ville, que Maistre Augustin de Thou, Aduocat, resigna sondit Office de Lieutenant des Preuost des Marchands & Escheuins en faueur de son fils, le seize Septembre 1533. & ensuite interuint vn autre Edict du Roy de l'année 1546. portant interdiction à tous Officiers de poursuire lesdites Charges de Preuost des Marchands & Escheuins. En suite de quoy fut fait l'Edict pour l'election des Preuost des Marchands de l'année 1554. de l'explication duquel il s'agist, par lequel furent establis dix de Messieurs les Officiers des Cours Souueraines dans ledit Conseil de la Ville, pour suppléer au defect desdits Preuost des Marchands & Escheuins, qui n'estoient gradués, & pour faire aussi la fonction dudit Lieutenant desdits Preuost & Escheuins gradué, qui a esté depuis supprimé au moyen de cét Edict; De sorte que l'on ne doit considerer lesdits Preuost des Marchands & Escheuins, que

comme



comme simples Citoyens & non comme Officiers.

Pour la Police, les ceremonies, receptions d'Officiers de Police & de la Milice, de Gouverneurs de ladite Ville, le soing des portes, murailles, l'entretienement des fontaines & la distribution d'eaux & les choses que l'usage enseigne & dépendent d'une habitude & experience, les notables Bourgeois vians de leurs rentes sont destinez principalement par cét Edict à ce ministere.

Pour la connoissance des differens qui arriuent pour raison de la marchandise, l'ordre des payemens, l'usage des Lettres de Changes, les protés, les escheances, en somme tout ce qui appartient au commerce & trafic de la marchandise, les Marchands non mecaniques sont destinés à cét employ; En sorte que ce Conseil de la Ville, est comme vn abregé & Epitome de tout ce grand Corps de la Ville de Paris, que le Prince a voulu presque immortaliser par cette disposition.

La seconde consideration est prise des termes ausquels est conceu le present Edict, que les Conseillers de nostre dite Ville de Paris qui sont vingt-quatre : lesquels ont le serment de donner conseil pour les affaires de nostre dite Ville & les plus grandes & importantes d'icelle. De maniere que le Roy appellant lesdits Conseillers de sa Ville de Paris, on pourroit reputer lesdits Conseillers Royaux, comme les Officiers de la Maison du Roy sont censez Officiers Royaux; *Tandem si non immediate, tandem mediate*, & ces termes d'auoir serment de Conseiller les affaires de ladite Ville, & les plus grandes & importantes d'icelle, sont termes & dictions vniuoques qui ne peuuent s'entendre en autre sens, sinon que lesdits Conseillers doiuent conseiller & juger de toutes les affaires sans distinction : ce qui se justifie encores par cette reduplication & anadiplose des plus grandes & importantes d'icelle, lesquels termes comprennent les grandes & importantes & les petites, les affaires ordinaires & extraordinaires, & que leur conscience aussi bien que leur institution les y oblige estroitement, puis qu'ils y sont abstrains & obligez par serment public dès l'instant de leur reception, de poursuiure l'execution des Edicts & Ordonnances pour la fonction de leurs charges, ainsi que les Ephebes d'Athenes, dont chacun promettoit de combattre pour les loix de son Pays, soit seul, soit en compagnie, *ἢ μόνος ἢ μετὰ πολλῶν*.

La quatriesme raison se tire de deux circonstances qui consistent en fait, dont la premiere se tire du temps & espace que dure la Magistrature, tant du Preuost des Marchands que des Escheuins, & la seconde, des personnes qui briguent ces charges & y sont le plus souuent admises.

Il faut aduoüer par la premiere circonstance du temps de deux ans que ledit terme de deux ans qui borne cette Magistrature, n'est suffisant pour



instruire parfaitement des personnes en l'entiere & parfaite cognoissance de la science necessaire pour l'exercice de cette Magistrature, qui consiste partie en Jurisprudence, partie en Politique, partie en æconomique, Arithmetique, & sur des experiences & cognoissances, pratiques qui ne s'acquierent que par vne longue habitude & traditiue, qui reside entierement au Conseil de la Ville, qui est remply de personnes de toutes qualitez, qui exerecent leurs charges de Conseillers depuis quarante ans & plus, temps qui les a rendus consommez dans la cognoissance des faits & affaires de ladite Ville, & partant & absolument necessaires pour l'administration d'icelle, y ayant des affaires qui ne se traitent que de dix ans en dix ans, d'autres de six en six années, comme le Bail des Gabelles & autres, & partant n'est conceuable que des Magistrats qui n'ont jamais eu cognoissance d'une affaire en puissent iuridiquement juger.

Pour la seconde circonstance prite des personnes qui y sont admises, il semble permis de dire qu'il n'y a gueres de personnes qui aspirent à ces dignitez hors les Officiers de la ville, *Reipublicæ causa*, aussi le nombre est petit de ceux qui depuis plusieurs années, *Rempubicam, auxerint, adiuerint, conseruarint*: car les vns y accourent & entreprennent d'entrer dans ce Vaisseau comme ces Argonautes pour la conquete de la Thoison d'or; *Vel tanquam ad nundinas accedunt quemadmodum Stratocles & Democrides solebant se se mutuo ad messum auream inuitare*, comme dit Plutarque, les autres par honneur se contentans de l'esclat qui rejalt de cette dignité, & laisser cette marque d'honneur empreinte en leur famille, & mesler *ornamenta decurionalia*, avec les autres biens de leurs successions, *Magistratum instar, quos dicunt Codicillares qui dignitatis contenti nomine à re procul absunt*; Il y en a d'autres troisiemes, qui briguent ces charges pour l'honneur & le profit tout ensemble, se voulans en mesmetêps esleuer avec les aisles d'or d'Euripide, & les aisles celestes de Platon; *Plerumque tamen ad honores adipiscendos & ad rempublicam gerendam nudi veniunt & inermes nulla cognitione rerum nulla scientia ornati Cicero de legibus*; En sorte que s'il y a quelqu'un qui ait quelques estincelles de l'amour de la Patrie, estant reuestu de cette charge, il se refroidit aussi tost, il mange de ce fruiet de Lotos, il ne se cognoist plus luy-mesme, & devient semblable à celuy qui entreprend de pescher la Torpille, aussi tost qu'il la touche elle luy endort premierement la main & le bras, puis le corps, puis la teste, & devient tout insensible, si bien que jusques à ce qu'il ait tout abandonné, & la ligne & le poisson il est entierement interdit.

*Prædamque rebellem*

*Iactat, & amissa redit ex armatus habena. Claudianus.*

Et l'on pourroit croire qu'en ce vaisseau requeroit vne maladie pareille à



celle que le Prince des Medecins Hypocrate appelle *Endemios*, qui est familiere à certaines nations & familles qui se communique à tous ceux qui y sont admis, *Dedit hanc contagio labem & dabit in plures*: Qu'elle apparence y auroit-il donc de laisser la disposition entiere des affaires de ladite Ville, à des personnes si naïfvement représentées, & qui faisant plier l'interest public sous le particulier, ne peuvent rien apporter à l'advantage de la chose publique.

La cinquième raison, c'est que le Conseil de la Ville a esté tousiours fort consideré de nos Roys, par la cognoissance qu'ils ont eu des grands services que lesdits Conseillers ont rendu à cette Ville; Et comme nos invincibles Monarques ont tousiours chery en leur Estat ces deux diuinitez des Empires, la recompense & la peine, ils ont aussi decoré la charge de Conseiller de Ville de plusieurs beaux Priuileges, mesmes auparauint les charges des Preuost des Marchands & Escheuins, ce qui se justifie par le priuilege à eux accordé par le Roy Henry III. où il est porté par iceluy au fueillet vingt-quatrième du Liure des Ordonnances de la Ville, que les Preuost des Marchands & Escheuins jouyront de pareils & semblables Priuileges de leurs causes pardeuant nos gens tenans les Requestes de nostre Palais à Paris, comme les Conseillers de nostre Ville & Officiers domestiques.

Et par ces raisons il est vray de dire, que les defendeurs ont mauuaise grace de vouloir oster la cognoissance des affaires de la Ville, & de rendre les charges des demandeurs illusoires, & qu'ils deuroient plustost imiter les intelligences qui se contentent de tourner chacune son Ciel, sans entreprendre l'une sur l'autre, que d'alleguer par leurs defenses que les demandeurs ne sont point Iuges & capables de demander les Reglemens dont est question, & n'ont aucune fonction reiglée par les Ordonnances & Arrests, qu'ils sont à la verité Conseillers de la Ville, ou pour mieux dire des defendeurs quand ils ont besoin de leur aduis, & que les affaires le requierent, que ce sont simples preud'hommes, composez d'Officiers & Marchands pour donner aduis lors qu'il leur est demandé; l'Ordonnance de ladite Ville Chapitre cinquante-huict, qui est leur seul tiltre, dit qu'ils conseilleront les affaires de ladite Ville toutesfois & quantes qu'ils en seront requis par le Preuost des Marchands & Escheuins qui ont vne fonction bien plus releuée que celle des demandeurs, ayant l'honneur d'auoir le caractere de Iuges, prester le serment entre les mains du Roy, les Ordonnances leurs donnent toute administration de Iustice & de Police, les Arrests ne font mention desdits demandeurs que comme entierement dependans desdits defendeurs qui ont accoustumé de leur donner les ordres, & les assembler quand il est à propos, ce sont en effet les Assesseurs des Pre-



uoist des Marchands, ainsi que ceux qui assistoient les Magistrats de Rome pour les conseiller, mais ils n'estoient point pour cela Iuges, & n'auoient aucune fonction certaine ny reglée que celle qu'il plaisoit aux Magistrats. Monsieur Cujas dit qu'ils estoient bien Conseillers & non pas Iuges, *Erant Consiliarij sed non Iudices.*

A ces defences, remplies de raisons friuolles, ou plustost de suppositions, sauf correction, il semble qu'il auroit esté suffisamment satisfait, par ce qui a esté énoncé & déduit cy-deuant : Mais d'autant qu'il n'y a point de plus grande injustice que celle qui vient de la part d'où doit venir la justice, comme l'enseigne le Prince de l'Eloquence Romaine, les Conseillers de la Ville de Paris se trouuent engagez de respondre à icelles par chacun article, & faire voir à la Cour, comme dit Seneque, *Quæ decipiunt nihil habent solidi leuæ est mendacium perlucet si diligenter inspexeris.*

Et respondant au premier article des pretenduës defences, que lesdits Conseillers ne sont de la qualité de ceux qui peuuent demander Reglement.

Soustiennent lesdits demandeurs qu'estans les Conseillers ordinaires de ladite Ville, pour conseiller les faits & affaires d'icelle, créez par Edict & confirmez par les Ordonnances, & qu'estans empeschez & troublez en l'exercice de leurs Charges, au prejudice desdits Edicts & Arrests, & au grand desriment du Peuple, ils ont droit de demander le Reglement d'icelles : car comme dit Hierocles, *Oportet enim leges alteros deos esse putare, ad earum iussa se omnes formare atque instituere, & qui abroget, aut deroget obuiam eundum est, nam legum contemptio & antiquatio, nihil boni Cuius adfert.*

Quand au second article desdites defences, qui contient, que lesdits demandeurs ne sont point Iuges & n'ont aucune fonction reglée, qu'ils sont à la verité Conseillers de la Ville, ou pour mieux dire des Prud'hommes : disent les demandeurs que pour auoir vne parfaite connoissance de cette verité, que l'on veut faire passer pour vn probleme, il faut considerer en premier lieu, Que la Preuosté des Marchands est vne Iurisdiction entierement populaire, bourgeoise & municipale, de laquelle les Officiers ne sont consideréz comme personnes graduées ou initiées en la connoissance du Droit Ciuil, mais comme bons Citoyens qui se scauent moralement bien conduire ; aussi lesdits Preuost des Marchands & Escheuins ne sont mesmestenus de scauoir la langue Latine, ne subissent aucun interrogatoire & ne sont obligez de donner aucune marque de leur capacité & suffisance en la connoissance du Droit Ciuil, des Loix ny des Ordonnances, tant generales que particulieres, comme sont tous les autres Iuges & Magistrats, ny mesme le Procureur du Roy de ladite Ville : Car ils



estoyent autresfois tous tirez du Corps des Marchands, lors que la liberté des suffrages estoit en vigueur & n'ont besoin, pour y estre admis, que de la bien veillance des Eslecteurs; & n'y a que cette Magistrature & celle des Iuges & Consuls de cette Ville de Paris, qui ont conserué cette conformité avec celles de l'Empire Romain, pour estre seules eslectives & n'ont point de lettres de provision, estant assez d'auoir quelques marques particulieres appellées *Ornamēta Decurionalia*; De cecy faut tirer vne consequence infaillible, que si des personnes de cette qualité, qui sont Magistrats seulement *ad Beneficium non ad Iudicium*, se peuvent attribuer la qualité de Iuges, peut-on reuoker en doute que des Conseillers de Ville, desquels grand nombre d'entr'eux sont obligez par les Edicts d'estre graduez & pourueus d'Offices de Cours Souueraines: consequemment Iuges *meliori iure*. Que les Preuost des Marchands & Escheuins, lesquels reconnoissent bien les demandeurs pour Iuges, puis qu'ils sont fort souvent necessitez de les mander à l'Hôtel de Ville pour juger avec eux des affaires de ladite Ville qu'ils estiment ne pouuoir juger seuls; & ainsi estans lesdits Conseillers fondez en raison & confirmez par la possession, cela passe pour vn auuglement, de soustenir par lesdits defendeurs, qui ne sont la plupart que des Marchands, sans lettres, science & experience, que lesdits demandeurs ne sont point Iuges d'vne Iustice & Iurisdiction Bourgeoise, en laquelle il n'est question que d'vne simple eslection pour estre en mesmetemps Iuge & Magistrat, comme il se pratiquoit durant l'Empire Romain en toutes les Villes alliées des Romains, où les Conseillers estoient tirez des Decurions, qui estoient les principaux Bourgeois ainsi appelez, à cause qu'il estoient les chefs de chaque dixaine. Mais ces eslections ny cette Magistrature n'ont point cette vertu que le laurier d'Hesiodé, qui inspiroit les Pasteurs qui s'approchoient de luy de dire des merueilles & d'auoir de nouvelles lumieres & connoissances au dessus de leur naissance & de leur condition; Aussi la plupart desdits defendeurs sortent de cette Magistrature aussi peu éclairés qu'ils y sont entrez. Adjoustent lesdits demandeurs que leur fonction est suffisamment réglée par les Ordonnances & Edicts qui les declarent Conseillers ordinaires, pour conseiller les faits & affaires de ladite Ville, mesme les plus grandes & importantes d'icelle, & qui ont cét aduantage d'estre les plus anciens Conseillers en titre d'Office de tout le Royaume, apres les Parlemens, estans créez dès l'année 1190. confirmez par les Ordonnances de 1431. & 1450. & par l'Edict du mois de May de l'an 1554. deuant mesme les Conseillers Presidiaux, qui ne furent créez qu'en l'an 1551. car auparauant ladite année les Magistrats se seruoient des anciens Aduocats pour Assesseurs & Conseillers.

Les demandeurs ne rejettent point cette qualité de defendeurs que leurs



attribuent les defendeurs, estans ravis qu'ils reconnoissent que cette belle qualité qui estoit en plus grande estime que celle de Conseiller par toutes les Villes de l'Empire Romain, leur est fort conuenable & qu'ils sont ces *Defensores ciuitatis*, de laquelle qualité les defendeurs en peuuent bien rendre tesmoignage: d'autant que lesdits Conseillers ont tousiours defendu l'interest du Peuple en toutes les rencontres. Aussi quant il a esté question d'establir des droicts sur le public, les defendeurs n'ont osé assembler lesdits Conseillers, sçachant fort bien qu'ils s'y seroient oppolez, & ont vsé de cette adresse, ayant fait inserer dans les Edicts de cette nature, Sans qu'il soit besoin d'assembler le Conseil de la Ville, afin de faire mieux reüssir leurs entreprises, au lieu de se souuenir de la clause principale de leur Commission, pareille à celle des Consuls Romains, qui estoient *uideant Consules ne quid respublica detrimenti capiat*. Mais au contraire lesdits Conseillers peuuent faire aisement le serment des anciens Senateurs Romains, *Nihil opesua factum quo cuiusquam salus laderetur, neque se pre-mia aut diuitias ex calamitate ciuium petere*.

Quand à ce qui est allegué par lesdits defendeurs par la suite des mesmes defenses, que l'Ordonnance de ladite Ville, chapitre 58. qui est le seul tiltre desdits Conseillers, dit, qu'ils conseilleront les affaires de ladite Ville toutesfois & quantes qu'ils en seront requis par les Preuost des Marchands & Escheuins, qui ont vne fonction bien plus releuée que celle des demandeurs, qui y ont suffisamment respondu par l'énonciation de leurs tiltres qui destruisent ces alterations de texte desdites Ordonnances, & fait voir qu'ilss'estudient dauantage à rechercher leur vtilité particuliere, qu'à instruire des Ordonnances de la Ville, qui sont la regle de leur Magistrature, ayant changé le texte, qui ne dit pastoutesfois & quantes qu'ils y seront appelez, mais toutesfois qu'ils y seront appelez; ce qui emporte avec soy vne injonction aux demandeurs de s'acquitter de leur charge, & non pas vne prohibition de connoistre des affaires de ladite Ville lors qu'ils sont appelez: les demandeurs font voir que par la mesme Ordonnance ils sont qualifiez du tiltre de Conseillers ordinaires quetaisent lesdits defendeurs, comme aussi l'Edict de l'année 1554. cy-dessus énoncé, lequel regle la fonction desdits Conseillers, les qualitez d'iceux, l'ordre qui doit estre obserué pour la conseruation de cette Compagnie; Car c'est bien regler ladite fonction de Conseiller de Ville, quand il est porté par ledit Edict expressement, que lesdits Conseillers auront le serment de conseiller les affaires de ladite Ville & les plus grandes & importantes d'icelle: car par ces mots d'affaires de ladite Ville, doiuent estre entendues les affaires ordinaires, & par ces termes, & les plus grandes & importantes d'icelle, doiuent estre entendues & signifiées les extraordinaires; De maniere que par ledit Edict



la fonction se trouue entierement reglée, & n'ont besoin lefdits Conseillers d'aucun mandement pour assister à la decision de toutes les affaires ordinaires & reglées dudit Hostel de Ville, mais qu'ils y doiuent assister & s'accommoder à l'ordre estably en iceluy, & au temps & heure que lesdites affaires se decident, & aussi obtemperer aux mandemens desdits Preuost des Marchands & Escheuins pour les affaires extraordinaires. Et ainsi ne sert de rien de dire par lefdits defendeurs que lefdits Conseillers ne doiuent s'assembler & venir au Conseil de ladite Ville que quand ils sont par eux mandez & qu'ils le trouuent à propos, interpretant mal ledit article des Ordonnances, mais cette contestation se trouue assez éclaircie par ledit Edict de 1554. cy-deuant énoncé, qui est postérieur ausdites Ordonnances, les explique nettement, & est la dernière Loy qui doit estre suivie: parce que *Lex posterior abrogat priorem, & postrema quæque Lex grauißima est*, Cicer. Philip. 12.

Et quand à ce que lefdits defendeurs alleguent auoir vne fonction plus releuée que lefdits demandeurs: respondent lefdits demandeurs que si lefdits defendeurs ont le premier pas & la presceance, c'est à raison de l'ordre, qui est l'ornement & la perfection de toutes les Compagnies: Car comme dit Pline en vne de ses Epistres, *Discrimina ordinum dignitatumque obseruanda sunt quæ si confusa permixta turbataque fuerint nihil ea æqualitate inæqualius*, & cette priorité est celle que les Logiciens appellent *ordinis non dignitatis*. Et poursuient lefdits defendeurs de dire, que les Ordonnances leur donnent toute administration de Iustice & de Police; à quoy respondent lefdits demandeurs, que lefdits defendeurs n'ont aucunes Ordonnances qui ne soient communes entr'eux, & ne le scauroient verifier.

Comme aussi de dire par les defendeurs que les Arrests ne font mention desdits demandeurs, disent lefdits demandeurs que les Arrests font mention d'eux, & leur donnent vn pareil droit qu'ausdits defendeurs dans l'administration des affaires de ladite Ville, sans qu'ils dependent d'eux en façon quelconque, ce qui est aisé à justifier par les Arrests de la Cour du 14. Septembre 1648. pour le fait des Rentes, & par celuy du mois de Decembre 1649. pour la creation & establissement des Syndics des Rentes, qui est vn tiltre bien puissant pour prouuer les desordres & maluersations qui se commettent audit Hostel de Ville, & finissent lefdits defendeurs la preface de leurs defences que lefdits demandeurs sont en effet les Assesseurs des Preuost des Marchands & Escheuins, ainsi que ceux qui assistoient les Magistrats à Rome pour les conseiller, mais ils n'estoient point pour cela Iuges, & n'auoient aucune fonction certaine ny reiglée que celle qui plaisoit aux Magistrats. Monsieur Cujas dit qu'ils estoient bien *Conseillers & non pas Iuges, Erant Consiliarij sed non Iudices.*



Disent lesdits demandeurs que ces dernieres raisons sont aussi peu valables que les precedentes, & par le moyen d'icelles leur oster la qualite de Iuges & rendre leur charge, *Nomen inane & Senatorium ordinem grauem sarcinam*, comme dit Boece, & faire passer vne vsurpation pour vne authorite legitime, alleguant sur ce sujet l'exemple des Magistrats Romains, & l'autorite de Monsieur Cujas, ce qui fait bien voir qu'ils sont aussi peu versez en la cognoissance de la Republique Romaine, des liures de Droit de Monsieur Cujas, que des Ordonnances de la ville, car s'ils s'estoient appliquez à l'Histoire Romaine, ils sçauoient que les Preteurs de Rome estoient d'ordinaire si ignorans qu'ils n'eussent sçeu prononcer leurs Sentences; *Tria verba pronuntiare nequibant nisi præcuntibus Assessoribus*, dit Seneque: Qu'aussi les Presidens & Proconsuls des Prouinces ne jugeoient pas d'ordinaire les procez eux-mesmes, mais les faisoient juger par leurs Assesseurs, & c'estoient ceux-là & non les Magistrats, *Qui tenebantur præstare scientiam νόμων καὶ τῶν ἰσχυρῶν*, mesme ils n'estoient tenus de respondre des fautes commises en leurs jugemens, mais bien lesdits Assesseurs, ce qui s'applique fort bien aux Conseillers de Ville.

Et quand à l'autorité de Monsieur Cujas alleguée & citée par lesdits defendeurs, c'est vne pure supposition, sauf correction, parce qu'au Chapitre de *Assessoribus*, ledit Docteur parle en ces termes: *Assessores quoque non sunt Magistratus sed Consiliarij & comites Magistratuum urbanorum vel Prouincialium, vel quibus hi mandauerunt suam iurisdictionem delati ad ærarium, vel in commentarium Principis, inter eos qui salaria ferunt de publico, vel Consiliarij iudicum à Principe, datorū vel Procuratorum reipublicæ NAM ET HI IUDICES ERANT.* De sorte que Monsieur Cujas ne qualifie seulement pas les Conseillers du titre de Iuges, mais les declare compagnons des Magistrats, qui est vne puissante autorité pour appuyer les demâdes desdits Conseillers, qui n'est pourtant absolument necessaire; car en France le Droit & les Loix Imperialles & Romaines ne sont prises que pour raisons, car les Ordonnances de nos Roys y ont pourueu, & les Ordonnances & Edits cy-dessus énoncez, sont les veritables & les plus asseurez fondemens des pretentions desdits demandeurs. Mais Aristote passe plus outre, ne declarant pas seulement les Conseillers Iuges, mais aussi Magistrats, desquels il fait trois sortes, les Officiers de Conseil, de Gouvernement & de Iustice, au Chapitre 15. du 4. liure des Polit.

Ces raisons generales premierement establies, & qui ont pour fondement les Ordonnances & Edicts cy-dessus cottez, sont suffisantes pour destruire l'absurdité du pretendu raisonnement que les defendeurs alleguent en suite par leurs defenses de dire contre le premier & second articles des demandes des demandeurs.



Que pour forcer les defendeurs & leurs successeurs d'assembler apres l'election des Preuost des Marchands & Escheuins, pour regler le Bois & le Charbon, faire la Police, & deputer deux d'entr'eux pour faire observer les Reglemens; cette demande est insupportable & destruite, par ce qui a esté cy-deuant dit, qu'elle apparence d'obliger les superieurs à rendre raison aux inferieurs, que ceux qui donnent la loy la recoiuent, les defendeurs ne rendent raison de leurs charges qu'au Roy & au Parlement: Le serment qu'ils rendent à sa Majesté portent nommément qu'ils conserueront & maintiendront les Priuileges de la Ville, ce ne seroit pas les maintenir que de les démembrer & laisser perdre le pouuoir & l'autorité que les Roys leur ont donné; les defendeurs en effet n'y ont que l'interest d'honneur, n'estans esleus que pour vn temps, mais comme ils ont esté admis en leurs charges par le choix de leurs Concitoyens, ils sont aussi obligez d'en conseruer les aduantages: Si les longues guerres ont apporté quelque desordre dans la Ville, & si les denrées y ont esté cheres, chacun en sçait la raison, mais pour le moins l'abondance a esté tousiours tres-grande, & le prix, eu esgard aux charges, a esté réglé le mieux qu'il a esté possible, & les Reglemens de Police executez & affichez; s'il y a eu conuiuee des Marchands, elle a esté bien punie; l'on a fort empesché les exactions des Gagne-deniers; les demandeurs ne se peuuent vanter d'auoir plus d'intelligence & bonne volonté pour le public que les defendeurs, mais bien l'esprit d'usurpation.

A quoy respondent les demandeurs, qu'il paroist assez dans les termes dont se seruent les defendeurs, disant qu'on les veut forcer, & que ces demandes sont insupportables, qu'ils n'ont guere d'inclination à faire le bien public, puis que c'est les forcer de demander que les Reglemens de Police soient entretenus, qui est leur principale fonction, & qu'il leur est entierement insupportable de l'accorder; Ils ressemblent aux vieux vlceres, comme dit Seneque au troisieme, *De ira vt vlcera ad laeuem tactum deinde etiam ad suspicionem tactus condolescunt ita auius affectus minimis offenditur adeo vt quosdam salutatio, epistola, oratio & interrogatio ad litem euocent.* Aussi lesdits defendeurs s'écrient à la simple proposition d'assembler le Conseil de la Ville pour faire observer les Reglemens, on nous veut forcer, cela est insupportable, car ces Assemblées du Conseil de la Ville sont cette Lanterne que l'on allumoit à Sparte pour cognoistre les choses les plus cachées.

Quand à ce que lesdits defendeurs exposent qu'ils n'ont à rendre raison qu'au Roy & au Parlement, les demandeurs ne pretendent aucun compte ny raison desdits defendeurs, sinon qu'ils ayent à assembler le Conseil de la Ville pour reprimer les abus qui se commettent en la Police; mais au



contraire lesdits demandeurs s'offrent de leur rendre compte des contrauentions, abus & monopoles, & maluersations qui se commettent sur les ports, & de faire cognoistre ceux qui y trempent, & notamment en la distribution du bois & charbon.

Et quand au serment que lesdits defendeurs rendent de conseruer les Priuileges de la Ville, ce ne seroit les maintenir que de les démêbrer, qu'ils n'y ont que l'interest d'honneur, n'estans esleus que pour vn temps, qu'ils ont esté admis par le choix de leurs Concitoyens, & qu'ils sont obligez d'en conseruer les aduantages.

Les demandeurs disent qu'il semble ainsi qu'alleguent lesdits defendeurs que les Priuileges de la Ville, & les Ordonnances soient des pieces & des loix establies pour renuerfer l'ordre, la Police & la Iustice de la Ville, qu'ils sont obligez de conseruer, & que le bien des Citoyens consiste dans le desordre & maluersation manifeste qu'ils cognoissent se pratiquer journellement tant il y a d'égarement en leurs responses, comme aussi qu'ils n'y ont que l'interest d'honneur; & dans l'article suivant ils demeurent d'accord qu'il y a des droits reglez qu'ils recoiuent, qu'ils sont obligez à vne reconnaissance du choix que leurs Concitoyens ont fait de leurs personnes.

Mais les defendeurs ne disent pas qu'en supposant vne reconnaissance imaginaire ils commettent vne ingratitude notoire & veritable, tant envers leur Patrie, en faisant violence aux loix & Ordonnances qu'ils veulent alterer par des interpretations captieuses, & faire illusion à la Iustice en voulant bannir le Conseil de ladite Ville, que Platon dit estre l'ame de la Cité, & que c'est par luy que se maintiennent les Villes, les Prouinces, les Estats & la santé des hommes qu'enuers lesdits Conseillers auxquels ils ont la principale obligation de leur eslection, puis qu'ils sont les principaux eslecteurs des Preuosts des Marchands & Escheuins, & qui les admettent en la poursuite desdites charges, au lieu de sacrifier aux graces, & de suivre le conseil de Pline, *Ingenui pudoris est fateri per quos profeceris, & hæc quasi merces auctori iure merito pensitanda est, ne fures esse videamur.*

Et enfin que si les guerres ont apporté quelque desordre, les denrées cheres que l'abondance y a esté, que le prix a esté bien reglé, les Reglemens executez & affichez, les contreuenans punis; A cela disent les demandeurs que si les desordres estoient moins publics, & les contrauentions aux Ordonnances moins connues, on prendroit les defendeurs pour des Catons, Scipions & Publicoles, & pour des hommes, *Tanquam diuino munere donati reipublicæ*, pour les playes qu'ils ont receues en cōbatant pour la chose publique, mais le contraire estant cogneu de tout le monde pour la negligence qu'ils apportent au deub de leurs Charges, à la conseruation de



la Magistrature, *Et intuenda dignitate*; veu que le plus considerable d'entr'eux delaisse presider volontiers dans les occasions les plus releuées, y souffrant des personnes faire la fonction, vn autre s'enfuit à Orleans pendant le blocus de Paris, ainssi cela passe pour vn mensonge accompagné de pompe & d'ostentation; car s'il y a eu de l'abondance & de l'affluence de toutes choses necessaires à la vie, elle a esté causée par vne prudence plus affectionnée & plus clair-voyante que la leur; c'est d'elle, dont se peut vanter la Ville de Paris, comme faisoit autrefois celle de Delphes, qu'à cause de l'Oracle qui habitoit leur Ville, toutes choses y abondoient, que l'air y estoit extremement salubre, que le territoire y estoit merueilleusement fertile, que les mœurs les plus farouches si adoucissoient, & c'est à cet incomparable Parlement, gardien & interprete des loix de nos Roys, à qui cette comparaison s'applique fort bien, & à qui la Ville de Paris a l'obligation toute entiere de l'abondance & de son bon-heur; Et quand aux Reglemens ils ont esté à la verité affichez, mais ils sont demeurez sans execution, estant des loix mortes si elles ne sont animées par l'amour & la diligence du Magistrat, qui est la loy vivante & parlante, *INFIRMA ENIM LEX EST, quæ nervos non habet aduersus facinorosos*, dit Demosthene.

Et ainssi que la Cour void qu'à bonne & iuste cause les demandeurs sont receuables à demander conformement ausdits deux articles, le Reglement du bois & charbon, & qu'en ce faisant qu'incontinent apres l'eslection des Preuost des Marchands & Escheuins, Assemblée sera faite desdits Preuost des Marchands, Escheuins & Conseillers, pour regler le prix dudit bois & charbon, & ce que les Desbardeurs, Chargeurs, Mouleurs, Aydes Mouleurs & Chartiers deuront prendre, mesmement les Mesureurs & Porteurs, & que le Reglement sera affiché par placard sur fer blanc, comme il s'est tousiours pratiqué par les Preuost des Marchands & Escheuins, qui ont esté religieux obseruateurs des Ordonnances, & amateurs du bien public, ce qui se iustifie par le Registre des Ordonnances de la Ville, au 60. Chapitre d'icelle, contenant les Ordonnances faites par le Roy François premier, fol. 199. & 200. qu'aux Assemblées faites en execution d'icelles pour la Police du bois, charbon & autres Marchandises, ont esté mandez non seulement lesdits Preuost & Escheuins & Conseillers, mais aussi les Quartiniers & notables Bourgeois, & d'abondant par les Preuostez de Messieurs de Marly President, qui des le 26. Aoust de l'année de sa promotion fit ladite Assemblée de Monsieur de Charmeaux aussi Preuost des Marchands le penultième Aoust de l'année de la promotion, de Messieurs Miron & autres, dont la gloire & la reputation dureront autant que la Preuosté, & encore à l'exemple du Preteur Romain, lequel aussi-tost qu'il auoit pris possession de son Magistrat, proposoit en public son Edict, lequel s'ap-



pelloit *Lex annua*, dautant que la Magistrature ne duroit qu'un an, & faisoit vne graue harangue sur les merites avec lesquels la justice deuoit estre administrée, *Et ut videlicet*, dit Seneque, *una eademque opera auditores sui officii admoneret & ipse sui reminisceretur.*

Que le second article leur sera aussi accordé, s'il plaist à la Cour, & qu'en ce faisant qu'il sera député à la dite assemblée deux desdits Conseillers, qui se transporteront sur les Ports pour voir si lesdits Reglemens seront bien executez, dont ils dresseront leur procez verbal.

Et disent lesdits demandeurs que de contester cét article, c'est consentir la ruine du Temple & renuerfer les Autels de la Justice: car se seroit inutilement establir des Loix pour les laisser sans execution, y a-t'il rien de plus loüable, que de se vouïer au public sans recompense, sans reconnoissance & sans autre honneur que celuy qui rejalist de la connoissance d'auoir bien fait; Les Conseillers en cela imitent ces animaux charitables dont parle Pline, qui se secourent les vns les autres: voyans que les Preuost des Marchands & Escheuins plient sous le faix des affaires publiques, ils viennent à leur secours pour reformer infinis abus qui se commettent en la distribution du bois, charbon & autres marchandises: car pour le bois il ne s'en debitte point de la qualité des Ordonnances, soit pour la nature d'iceluy, longueur, grosseur, meslé de mauuais bois, que l'eschantillon qui s'apporte audit Hostel de Ville n'est pareil au bois du batteau, que les Moulleurs, qui sont cens soixante, ne donnent la mesure & ont intelligence avec les Marchands & courent leur maluersation, les Aydes à Moulleurs, en pareil nombre, qui sont Officiers inutiles, belles productions des Partisans, dont il n'y en a que treize de pourueus, les autres sont Porteurs de quitancesses, les Chargeurs qui sont cent dix-sept, les Controllours des quantitez qui sont vingt, ne seruent de rien du tout, & qui prennent des droicts aussi excessifs qu'illicites, qui ont achepté ces Offices pour voler le public & se parer d'un honnestre pretexte pour couvrir leur oisuereté, au prejudice d'un Arrest de la Cour du 4. Aoust 1634. publié à son de Trompe le dit jour, portant defences à toutes personnes d'achepter Offices de Ville de nouuelle creation, & de leuer aucuns droicts sur les denrées, comme bois, foin, charbon & chaux, à peine de concussion, qui ont pour leur domicile le cabaret & pour leur lieu d'exercice le jeu de boules; De sorte que les Ports se trouuent tousiours degarnis de tels Officiers inutiles & à la foule du peuple, desquels on deuroit retrancher les trois parts. De sorte que le Marchand de bois & charbon est le Vendeur, le Moulleur, l'Ayde à Moulleur, le Chargeur & Controllour tout ensemble, ayant des valets qui font toutes ces fonctions: & par ainsi le public trompé par tout, & frustré du ministere de la Justice ( quoy que tres-mal renduë ) que sont obligez de rendre ces Of-



ficiers au public, que la pluspart desdits Officiers au lieu d'exercer en personnes leursdites charges, commettent des Gaignedeniers à leur place, qui sont valets des Marchands, auxquels ils donnent seulement seize sols par iour & retiennent à eux tous les esmolemens attribuez ausdits Offices, en quoy le public reçoit d'autant plus de prejudice: car sous pretexte de si peu de salaires & qu'ils sont desia au service du Marchand, il arrive que l'on n'a iamais la mesure, ne voulant prendre la peine bien souuent de corder le bois, afin d'oster la connoissance de leur maluersation; & c'est chose honteuse que le Peuple soit dans la croyance que la pluspart desdites Charges & Offices appartiennent à aucuns desdits defendeurs, qui les tiennent & en profitent des émolemens sous le nom de leurs domestiques & gens par eux interposez: ce qui se justifie puissamment par les artifices que lesdits defendeurs apportèrent en l'assemblée generale faite audit Hostel de Ville en l'année 1648. par l'ordre du Parlement, pour proceder à la reformation d'un si grand nombre d'Officiers & diminuer les charges & imposts incroyables que lesdits Officiers perçoient, où les Preuost des Marchands & Escheuins, en preuenant vn chacun en son suffrage, & persuadant à l'assemblée qu'il ne falloit rien changer, parurent pluslost aux yeux du public pour des Protecteurs desdits Officiers que pour des Iuges, & d'abondant sont interuenus avec lesdits Officiers au Parlement, & sont joints avec eux pour la defense de leur cause.

Que le troisieme article leur doit estre pareillement accordé, s'il plaist à la Cour, n'estant pas de moindre consideration que les autres, nonobstant les foibles raisons portées par les defentes desdits defendeurs contre iceluy, disans que les renuoyz ne s'adressent qu'à eux & non ausdits Conseillers, & partant s'attribuer à eux seuls l'exécution desdits renuoyz; mais soustiennent lesdits demandeurs que les adresses & renuoyz qui se font des Cours Souueraines aux Iustices inferieures & Subalternes, se font à vne partie pour le tout, comme il se pratique au Chastelet de Paris, où les renuoyz se font au Preuost de Paris, & c'est le Presidial qui en a l'exécution, & ainsi de mesme à l'Hostel de Ville. La consequence de cet article a de si puissantes considerations, que la licence en doit estre entierement reprimée, & cette entreprise de deliberer par les Preuost des Marchands & Escheuins sans ledit Conseil, est cause de l'établissement de mil Officiers inutiles & entierement à l'oppression du Peuple & desdits Officiers mesmes, qui ont achepté des Offices de ville ces dernieres années à des prix si excessifs, que la valeur de ces Charges est vn poids si pesant, qu'ils courent risques d'en estre opprimez, cōme Vendeurs de vin, Moulleurs de bois, Aydes à Moulleurs & Chargeurs en charrettes, Controlleurs des quantitez, Mesureurs & Porteurs de charbon, Porteurs & Mesureurs de bled & autres grains, Payeurs des Rentres



& Controллеurs d'icelles, que l'on peut comparer à ces animaux faineans, que Platon dit estre dans la nature, qui vivent sans rien faire, & se contentent de piquer tantost l'un, tantost de mordre l'autre, le reculement des quartiers & retranchement d'iceux partent de cette mesme source : Bref, la ruine de la Ville de Paris & des Particuliers. Et partant vray de dire, que defences seront faites aul dits defendeurs de faire aucune deliberation sur les renuoy, de quelque nature qu'ils puissent estre, sans auoir assemblé le-dit Conseil de la Ville, à l'exemple des Consuls Romains, ausquels il n'estoit permis de rien entreprendre de consequence sans l'aduis dudit Senat, & pour ce que Romulus l'entreprenoit sans l'aduis dudit Senat; Quelques vns ont voulu dire qu'il fut déchiré par les Senateurs, & Seneque nous apprend, *Ne ioui quidem ipsi si aliquid fulmine percuti debet suum Concilium satis; admittit deos authores*, Que si lesdits Preuost & Escheuins *more maiorum*, qui auoient esté esleus par le veu des Peuples & avec la liberté des suffrages qui s'estoient donnez à leur patrie, en renonçant à eux-mesmes, en se sacrifiant tant de fois pour l'honneur de leur Prince & le salut de leur Patrie, eussent fait reflexion sur le nom d'Escheuins qu'ils portent & qui leur est donné à cause de leur principale fonction, qui est tiré du mot escheuer, qui vaut autant à dire que guarentir & defendre, estant deriué du verbe latin *Caneo*, qui signifie en garder & contre-garder. Ils eussent appelé desdites creations aux premieres assemblées des Estats, mais par un defect d'amour & de bien-veillance ils leur ont favorisé l'entrée & facilité l'establissement, & peut-estre par les principes de quelques droicts qui se payent à la reception desdits Officiers; car on ne se presente deuant eux que *More persico, sine munere non te saluto*.

Que le quatrième article leur doit estre pareillement accordé, en ce qui concerne l'ouuerture des quartiers des arrerages des Rentes, quoy que les defendeurs alleguent que l'ordre par eux estably est infailible, qu'ils sont obligez aux Rentes & non lesdits demandeurs; à quoy ils respondent, que l'inconstance du temps & la necessité ennemies de l'ordre, interrompant tous les iours le cours de la raison & de l'équité. Il est necessaire que ladicte ouuerture des quartiers se fasse *in oculis omnium*, afin que le public connoisse tout ce qui se passe à son aduantage, estant à l'honneur & à la descharge des Preuost des Marchands & Escheuins, que l'on connoisse d'où procedent les retardemens: & quant à ce que lesdits demandeurs exposent qu'ils sont garends enuers le public desdites Rentes, telle garentie est fort heteroclite, & bien loin de la pratiquer, l'on sçait que telles charges se briguent, plustost pour entirer à soy le profit, que d'en profiter au public.

Quant au cinquième article; ne faut trouuer estrange si les demandeurs l'ont mis au rang de leurs demandes, bien que chacun sçait le prejudice que



le public a receu des Traitez illicites des Generalitez d'Orleans & de Moulins qui ont esté faits en cachette, les sommes de deniers que les Rentiers disoient auoir esté données, l'Arrest du Conseil d'Estat du dernier Fevrier 1646. rendu sur les plaintes & les larmes du Peuple, par lequel il est ordonné qu'il sera procedé à l'adjudication de la Generalité de Moulins en presence desdits Conseillers, en fera foy & en est le fondement en suite du Traité de la Generalité d'Orleans fait clandestinement, qui auoit esté déclaré nul & ordonné qu'il y seroit procedé de nouveau : mais les defendeurs firent estouffer vne si belle production par le credit qu'ils auoient près de d'Esmercy, lors Controlleur general & leur defendeur particulier : mais attendu la Declaration du 22. Octobre, qui reuoque lesdits Traitez, cét article se rencontre prescrit.

Que le sixième article leur sera aussi accordé & qu'ils assisteront aux comptes par estats que rendent les Receueurs & Payeurs des Rentes, pour les mesmes raisons cy-deuant alleguées, & pour empescher qu'il ne se passe rien au prejudice du public.

Que le septième article sera aussi executé, & qu'en ce faisant lesdits defendeurs seront tenus vne fois le mois d'assembler le Conseil de Ville pour leur représenter ce qui c'est passé, tant au fait de la Police que des Rentes, puis que cette demande est fondée sur la raison & confirmée par l'autorité des Arrests de la Cour, & notamment par le dernier du 4. Septembre 1648. publié à l'Hostel de Ville l'Audience tenant le 9. Septembre audit an, qui porte en termes expés, que d'autant que l'on reconnoist souuent les defauts des Loix & Reglemens à l'execution d'iceux, pour y remedier & aux desordres qui se pourroient glisser au fait desdites Rentes, assemblée sera faite à l'Hostel de ladite Ville de trois mois en trois mois des Preuost des Marchands, Escheuins & Conseillers de la Ville, *Quod notandum* & sert de prejugé en cette cause : lequel Arrest, par vn mépris de l'autorité de la Cour, n'a encores esté executé vne seule fois depuis deux ans.

Que le huitième article leur sera aussi pareillement accordé, sans auoir égard aux raisons desdits defendeurs qui se sont trouvées assez inutiles par l'establissement que la Cour a jugé à propos de Messieurs les deputez des Rentes *ἐνείμα τὸν τιτὸν* vne inuention diuine, establie pour arrester le cours des maluersations qui se commettent au regime desdites Rentes, ce qui fait voir en cét article comme aux autres la justice des demandes desdits Conseillers, lesquels ayant eu connoissance desdites maluersations & desordres, ça esté le principal motif qui les a obligez d'intenter leur action à l'encontre desdits Preuost des Marchands & Escheuins, qui est pendante en la Cour. Mais comme ils auoient abandonné le bien public à l'insolence des Adjudicataires des Traitez & Fermes affectées à icelles & des Re-



ceurs & Payeurs d'icelles, ils vouloient aussi empêcher qu'on n'y apportast le remede, ils ont traduit lesdits demandeurs au Conseil d'en Haut pour arrester le cours de la justice ordinaire. Dans ce silence la Cour y a pourueu par l'establissement desdits Deputez, qui font la fonction que faisoient autresfois lesdits Conseillers, lesquels sous les Preuostez de Monsieur Langlois, s'assembloient toutes les apresdisnées à l'Hostel de Ville, pour vaquer au fait des Rentes, ensuite deux fois la semaine, de Monsieur Miron lesdits Conseillers de Ville furent priez de venir travailler au compte des Payeurs, où ils presidoiēt en l'absence desdits sieurs Preuost & Escheuins, ce qui se justifie par les Registres de ladite Ville au feuil. 555. de l'année 1605. au mois de Feurier; par Arrest du Conseil Priué du 16. Feurier 1604. signé Lhuillier, est dit, que les deniers des Rentes seront mis es coffres de l'Hostel de Ville en presence desdits Preuost des Marchands, Escheuins & de deux Conseillers de Ville, & que le payement des arrerages sera fait en presence desdits Preuost des Marchands, Escheuins & d'un Conseiller de ladite Ville, & depuis ils y ont esté employez jusques aux dernieres Preuostez qui ont expulsé lesdits Conseillers, d'où est procedé le desordre desdites Rentes, les creations d'un nombre incroyable d'Officiers sur icelles, les retranchemens des quartiers & retardement d'iceux: & partant lesdits demandeurs esperent de la bonté de la Cour qu'ils seront reintegrez & maintenus en leur premiere fonction desdites Rentes, comme ils ont fait par cy-deuant: car encores qu'il y ait dix-huit Deputez establis pour veiller ausdites Rentes, cela n'est pas suffisant d'éclairer assez puissamment la conduire de cent soixante Payeurs desdites Rentes, qui sont autant de Briarées consommez en la science de la perfidie, qui n'ont achepté leurs Charges que pour se preualoir à surprendre l'innocence publique, ausquels il est besoin d'opposer autant d'ARGVs & de LINCÉES pour développer leurs fraudes & leurs artifices. Car lesdits Conseillers sont instituez pour conseiller les faits & affaires de ladite Ville, dont les Rentes en composent la plus excellente partie: & d'autant aussi que *Multa manus onus reddunt Lenius.*

Disent outre lesdits defendeurs que lesdits demandeurs ne sont du corps de la Ville, cela fait voir leur aduersion, mépris & mauuaise volonté, accompagnée d'une ignorance tres grossiere, veu que les Ordonnances & les Edicts cy-deuant énoncez determinent cette difficulté & font mention desdits demandeurs conjointement & inseparablement avec lesdits Preuost & Escheuins defendeurs, que l'on peut reputer n'estre du Corps de la Ville que comme les feuilles le sont aux arbres, qui changent & renouellent presque toutes les années & qui leur donnant beaucoup d'ornement, pour estre les plus agreables parties & les plus hautes esleuées, sont pourtant moins precieuses par leur necessité que le tronc & la racine, ausquels on  
 peut



peut comparer le Conseil de la Ville, qui ayant la faculté de faire & d'élire lesdits defendeurs eldites Charges, sont les parties effencielles & perpetuelles du Corps de ladite Ville, estant le *Seminariumistarum dignitatum*, comme on disoit du Senat Romain, au lieu que les defendeurs ne sont que des parties integrantes & changeantes, & qui sont plus de l'ordre & de la bienficeance que de la necessité; Et ainsi mal fondez de dire que le Conseil de ladite Ville n'est du Corps de ladite Ville, puis que donnant l'estre ausdits defendeurs, ils sont aussi plus necessaires, *Quia causa est prior & nobilior suo effectu*. Et cette verité se justifie d'autant plus par l'Arrest cy-deuant cotté du 4. Septembre 1648. par lequel il est ordonné que les Conseillers de Ville assisteront aux assemblées qui se feront de trois mois en trois mois pour raison des Rentes, comme aussi par celui qui porte l'establissement des Scindics desdites Rentes, où il est porté que l'eslection desdits Scindics se fera par lesdits Preuost, Escheuins & Conseillers de Ville, en datte du 29. Decembre mil six cens quaranteneuf.

Que les neuf & dixième articles leur seront aussi accordez, & qu'en ce faisant que l'Arrest qui ordonne que quatre desdits Conseillers seront presens à l'audition & examen, tant du compte du Domaine & Patrimoine de ladite Ville, que de celui des Octrois, duquel le Receueur de la Ville rend compte audit Preuost des Marchands par estats, sera executé, puis que cette demande a esté jugée par cy-deuant, & lesdits demandeurs sont fondez en Arrests, & qu'il s'agit de la conseruation du bien de ladite Ville, auquel lesdits Preuost des Marchands & Escheuins ont fort peu d'intereft, n'aspirant ausdites Charges que pour en tirer de l'auantage, où ils desirent plustost estre admirez & respectez que de profiter au public.

Que l'article vnième leur sera aussi accordé, parce qu'ils sont naturellement Controlleurs des deniers, bastimens & Domaine de ladite Ville, qu'en ce faisant lesdits demandeurs assisteront aux adjudications des Baux des maisons dependantes du Domaine & appartenances de ladite Ville, côme ils ont tousiours fait; ce qu'ils justifieront tant par les Extraicts des Registres de ladite Ville du mois d'Avril 1566. du 14. May 1602. jusqu'aux dernieres Preuostez, pour empescher les monopolles qui se pourroient faire. Cette demâde, quoy qu'establie sur la raison & sur l'exemple, a fait la mesme impressiion sur l'esprit des demandeurs, que ce vers d'Homere, qui mettoit Alexandre en colere lors qu'on le recitoit: Aussi lesdits defendeurs se sont en cela tellement esgarez, que d'appeller les plus sages desdits Conseillers chefs de parti, & le reste vne troupe de gens qui n'entendent pas les affaires: cette calomnie & médifance est celle que Plutarque appelle *πολὴν δρομήαν*, comme qui diroit retournante sur les calomniateurs: car les defendeurs ont telle habitude avec les Partisans & sçauent si bien la nature du party,



qu'ils l'ont toujours en la bouche, qui ne merite autre responce que celle que fit Ciceron defendant sa cause en plain Senat, *Que, innocentia agit causam suam, & depeut aussi que Bacche Baccanti si velis aduersari ex insana infaniorum facies.*

Ensuite lequoy disent les defendeurs qu'il y a de certains droicts reglez ayant dit auparauant qu'ils n'auoient que l'interest d'honneur, ces droicts sont semblables & font le mesme effet que l'eauë du fleuve Phenée en Arcadie, de laquelle ceux qui en boient, lors que le Soleil éclaire la Contrée, sont conseruez en parfaite santé, mais qu'elle est fort nuisible à ceux qui en boient de nuit: De mesme ces droicts, pris & perceus aux yeux de tout le monde, conseruent le Magistrat dans sa bonne reputation, mais s'il les prend en cachette, c'est signe qu'il les augmente de beaucoup: & c'est ce qui ternit sa reputation & ruïne tout l'honneur de la Magistrature, qui est vn flambeau qui éclaire les belles actions de sa lumiere, & noircit les mauues de sa fumée. Mais se seroit le plus seur de les abolir entierement, parce qu'il est bien difficile de garder la mediocreté; Il seroit donc necessaire d'establis cette Loy que prescrit le Prince des Philosophes pour la manutention des Estats au chapitre 8. du 5. Liure de ses Politiques, de faire que les Magistrats n'ayent que le pur honneur sans aucun profit, lucre ny esmolument, ce qui est conforme à la Nou. 15. qui defend aux Officiers Populaires d'auoir aucuns droicts & en rend la raison, *Conuenit quippe vnum quemque nobilium vicissim curam gerere ciuitatum, quas inhabitant & hanc eis rependere habitationis compensationem*, ou faire reuiure cette Loy *Iulia*, par laquelle il est dit, *Urbani Magistratus ab omni sorte se abstineant nēue, plus doni munerisue in anno accipiant quam quod, sit aureorum centum.*

Quant au douzième article, que les demandeurs y seront reintegrez & maintenus, & qu'en ce faisant ils assisteront aux Audiencies en tel nombre qu'il plaira à la Cour, qui sera changé par chacune semaine, nonobstant les extrauagantes raisons alleguées de la part des defendeurs, exposans que cette demande est insupportable, que les demandeurs demandent tout pour attrapper quelque chose, qu'ils hasardent tout n'ayant rien à perdre, qu'ils veulent s'establis pour la ruïne des autres; en quoy paroist la fuite de leur égarement, la rudesse de leurs termes, & l'absurdité de leur raisonnement, qui ne merite responce.

Et de dire aussi par les defendeurs que les demandeurs ne sont Iuges, & ne sont créez à l'instar des Officiers des Cours Souueraines ny Subalternes, qui seruent tous les jour d'Office & par le droit de leurs Charges & sans estre appellez, & qu'il ne leur est loisible de venir prendre place sans ordre particulier & mandement des Preuost des Marchands & Escheuins: cela n'est non plus digne de consideration. Car cōme dans la nature les corps superieurs



donnent le branle & le mouuement, & sont la regle des corps inferieurs. Aussi dans la Iurispudence, qui fait partie de la Morale, les Cours Souueraines sont la reigle & l'exemple des autres Iurisdiccions inferieures; Si bien que Messieurs les Conseillers du Parlement, qui sont Officiers en tiltre d'Office, sont aussi Iuges & sont tous actes de justice avec Messieurs les Presidens. L'on peut donc conclure que les Conseillers de Ville estans Officiers en tiltre d'Office, sont aussi necessairement Iuges, & sont en pouuoir de faire avec lesdits defendeurs tous Actes de Iustice qui leur est attribué par les Edicts & Arrests cy-deuant énoncez, & à l'instar des autres Iurisdiccions, sans qu'ils ayent besoin d'aucun mandement & consentement desdits defendeurs: Car côme dit Aristote, *Longum iter per præcepta breue, per exempla*, & de fait sont reconnus pour tels à l'Hostel de Ville, puis qu'ils jugent tousjours les affaires dudit Hostel de Ville, conjointement avec lesdits Preuost des Marchands & Escheuins. Mais passant outre, si l'objection desdits defendeurs auoit lieu & estoit receüe, les demandeurs ne tiendroient leurs Offices qu'à tiltre de Precaire desdits defendeurs, & qui sembleroit leur donner pouuoir de les abolir ou reuoquer quand bon leur sembleroit, qui est contraire aux Ordonnances, Edicts & Arrests, qui les declarent ordinaires, perpetuels & necessaires, mais soustiennent d'abondant qu'ils ne sont seulement pas Iuges, mais encores que les Quartiniers & Notables Bourgeois, lesquels aux Assemblées generales, qui se font audit Hostel de Ville, donnent leurs suffrages sur le sujet d'icelles qui sont suiuis, & par consequent sont Office de Iuges, mais cette opiniatreté de contester la qualité de Iuges ausdits demandeurs est autant prejudiciable à la Preuosté des Marchands & Escheuinage qu'ausdits demandeurs, & fait voir que lesdits defendeurs oublians l'honneur de la Charge qu'ils possèdent, ne scauent rien moins que d'en defendre la dignité, laquelle Preuosté ne peut tirer son ornement, son estime, sa force & estre considerable en l'Estat que par le moyen du Conseil de la Ville, & ce à raison des belles parties qui le composent, *Senatores semper adesse debent quod grauitatem res habet eum frequens est ordo Cicer. 3. de legib.* Aussi c'est plustost vn artifice du Procureur du Roy de la Ville & du Greffier, lesquels à l'exemple des Greffiers, Scribes & Praticiens des Magistrats Romains, qui apprenoient les difficultez des Charges de Magistrature Romaine aux nouueaux Magistrats, qui n'estoient la pluspart gens de lettres, & d'ailleurs le temps de leur Magistrature estant bref, estoient contraints d'apprendre les formes & la maniere d'agir de leurs Magistrats desdits Scribes, ce qui estoit cause qu'ils s'autorisent si fort, que Caton estant Questeur fust contrainct de se bander contr'eux, pour ce que, dit Plutarque en sa vie, qu'ils s'égalloient aux Magistrats, sous pretexte qu'ils leurs apprenoient ce qui estoit de leurs Charges, leurs reprochant



qu'ils se souuinissent, *Non esse Magistros, sed Ministros*, car c'est la mesme plainte que font lesdits Conseillers de Ville, contre lesdits Greffier & Procureur du Roy, qui donnent la Loy aux Preuost & Escheuins, & s'autorisent si fort à cause qu'ils sont perpetuels, & que lesdits defendeurs ne sont que transitoires, & d'abondant qu'estant pour l'ordinaire destituez de lettres & de connoissance des affaires de ladite Ville, ils se laissent enseigner par lesdits Greffier & Procureur de la Ville qui se qualifie du nom de Procureur du Roy, dont il n'a aucuns tiltres que ceux qui ont esté par son ordre & de ses deuanciers depuis trente ans, graués en marbre en quelques endroicts de la Ville, ce qui est cause qu'ils se sont rendus les Souuerains des affaires de ladite Ville, & apprehendent extremement que si lesdits Conseillers en prennent l'entiere connoissance, leurs Charges ne diminuent de beaucoup de pfofit & reuenue.

Quand au treizième, il sera dit, s'il plaist à la Cour, Que les resultats & deliberations des Assemblées seront signés du plus ancien des Conseillers de ladite Ville, qui assistera à ladite Assemblée, pour éuiter qui ne soit rien adjousté ny changé de ce qui aura esté resolu, & ce d'autant que si ce qui est resolu & deliberé esdites Assemblées de l'Hostel de Ville n'est agréé ny approuué, & selon l'inclination desdits defendeurs, les resolutions & resultats sont supprimez ou changez, ce qui a donné lieu au present article de demande, qu'il est aisé de justifier, & notamment par le traité & adjudication de la Generalité d'Orleans faite au mois de Feurier mil six cens quarante-huict, avec toutes les solénitez accoustumées en presence desdits Preuost des Marchands, Escheuins, Conseillers de Ville, & de Rentiers, où le nom du veritable adjudicataire fust changé le lendemain en celuy des Commis de Monnerot, au prejudice de la foy publique qui est vne pure illusion à la Iustice, vn mespris des Loix, Coustumes & Ordonnances.

Quand à ce que lesdits defendeurs soustiennent que tout ce qui est demandé par lesdits Conseillers est contre le seruice du Roy & du Public, qui ne seroit pas plus soulagé par les assemblées frequentes, qui apporteroient plustost le trouble que la reigle, bien que lesdits demandeurs semblent renoncer à tous gages & salaires, & estre seulement vn artifice pour s'introduire & se donner plus d'auantage que n'ont iamais fait les Preuost des Marchands & Escheuins.

A cela respondent lesdits demandeurs, que les defendeurs ressemblent à ces malheureux Philosophes qui appelloient la lumiere tenebres, & les tenebres la lumiere: Puis qu'ils ne sçauoient distinguer le vray d'avec le faux, le iuste de l'injuste, le bon d'avec le mauuais, & qu'ils estiment que le seruice du Roy & du Public resident dans l'injustice, le desordre & l'infidelité qu'ils tollerent, & sont semblable à ces Aiglons qui ne peuuent soustenir



l'esclat de la lumière du soleil de Justice, ne voyant pas que les demandes des demandeurs sont comme deux Tableaux qui representent au naturel le service & l'autorité du Prince qui resident, principalement en l'exécution de ses Edicts & Ordonnances, & l'autre l'image du bien Public en reprimant les abus, & reformant les maluerfations qui se pratiquent en l'administration de la Police de la Ville, sans exiger du Public aucune recompense, ce qui fait voir qu'ils n'ayment pas la suppression des recompenses, gages & salaires ressemblans à ces oyseaux qui se plaisent à voir de l'or.

Quand au quatorzième articles de leurs demandes, les demandeurs soustiennent qu'ils y sont bien fondez à ce que defenses soient faites ausdits defendeurs d'emprunter aucuns deniers en quelque maniere, & pour quelque pretexte que ce soit pour les consequences desdits emprunts, qui pourroient dans la suite du temps surcharger le Domaine de la Ville de tant de de btes que le fonds se trouueroit entierement consommé, & ne seroit plus en pouuoir de satisfaire à tant de sortes de dépenses qu'il conuient faire journellement, ce qui s'observe en toutes les Communautéz de Paris, où les Administrateurs mesmes sont perpetuels. A plus forte raison cette Loy doit estre imposée à l'esgard desdits defendeurs qui ne sont que transitoires & momentanes, & outre il se justifie par les Registres de ladite Ville.

Pour ce qui est de l'article quinziesme concernant les alienations, eschanges, engagemens à prix d'argent, Baux Emphiteoses du fonds & Domaine de ladite Ville & droicts d'icelle. Il plaira à la Cour ordonner que defenses seront faites ausdits defendeurs, de vendre, aliener, ou engager, & échanger en quelque façon & maniere que ce soit ledit Fonds, Domaine, Patrimoine & Droicts de ladite Ville clandestinement en cachette, & sans au prealable auoir assemblé le Conseil de la Ville, pour deliberer & juger avec eux si lesdites ventes, échanges, alienations & baux emphiteoses sont necessaires pour le bien de la Ville, à peine de nullité, cassation desdits Contrats & Traitez, à peine d'en respondre en leurs propres & priuez noms, eux, leurs enfans, vefues, heritiers & bien tenans, & ce attendu la profusion & mauuaise œconomie de idits defendeurs, dont la principale estude de quelques-vns d'entr'eux pendant leur Magistrature est de faire prêdre pour eux, sous noms empruntez, des terres, heritages & droicts, appartenans à ladite Ville, qu'ils ont à tel prix qu'il leur plaist, comme il se justifie par des alienations faites des dernieres Preuostez, ou leurs deuanciers, sous le nom de leurs Domestiques, se sont faits adjuger bonne partie des fossiez de la porte saint Denys, saint Martin & Mont-martre, pour des dix liures de rente, où ils ont fait construire des ruës entieres, desquelles ils perçoient plusieurs milliers de liures de reuenu, & outre, s'ils se font adjuger demy arpent de terre, ils en vsurpent deux fois autant, comme il est ayisé de prou-



uer par vne vente faite à vn Medecin du Roy, où il a fait construire vn jardin, dans lequel il a fait enclore plusieurs arpens de terre au dela de sa concession, qui est vne vsurpation & abus, qui est de tres-grande consequence, tolleré par lesdits defendeurs qui n'en poursuiuent jamais la restitution, & doit estre ordonné, sauf correction, que ces ventes se feront comme il a esté dit cy-deuant en l'article des Baux du Pont Nostre-Dame, & que les Contrac̃ts desdites alienations cy-dessus énoncés, seront cassez & annullez.

Que l'article seizième sera jugé tres-raisonnable, s'il plaist à la Cour, & ce faisant, qu'il sera fait defenses ausdits defendeurs de faire aucuns Traitez & Marchez avec Massons, Charpentiers & Entrepreneurs d'ourages, de plus de la somme de cinq cens liures, sans assembler sur ce le Conseil de la Ville, comme il a esté tousiours pratiqué és Preuostez & Escheuinages les mieux reiglez & les plus legales, & qui n'auoient point de besoin de censure comme les dernieres, pour les raisons qui ont esté cy-dessus deduites, & que lesdits Conseillers sont naturellement Controlleurs du Domaine, deniers, & bastimens de ladite Ville, la Cour pour cette raison par son Arrest du  
a supprimé lesdits Controlleurs créez en tiltre d'Office, & en a laissé l'exercice ausdits demandeurs, & laquelle qualité ne peut estre contestée ausdits Conseillers, puis que les Registres de la Ville en font foy.

Que le dix-septième & dernier article sera aussi declaré tres-equitable, s'il plaist à la Cour, à ce qu'il soit fait defenses ausdits demandeurs d'entreprendre d'escrire au Pape, Princes, Estats & Communautéz, sans l'aduis desdits Conseillers & deliberation du Conseil de ladite Ville, pour deux puillante raisons. La premiere, Qu'il n'appartient pas ausdits Preuost des Marchands & Escheuins d'escrire, ny donner aduis d'aucune affaire à qui que ce soit, qui peut estre importante au Roy & au Public: Et la seconde raison, Que lesdits defendeurs n'ayant pas l'habitude des affaires de ladite Ville, à cause de la briefuete du temps de leur Magistrature, ne peuvent pas auoir vne connoissance parfaite desdites affaires, qui importent à ladite Ville.

Ainsi la Cour void, qu'il n'y a guerres d'apparence de commettre tout aux defendeurs, qui perdant le soing de leurs Charges, n'ont autre regle que leur interest particulier & contre tout ordre de Iustice, & sans apparence de raison s'efforcent d'empescher l'entherinement des requestes des demandeurs & desdits Reglemens, qui ne vont qu'à la descharge, au profit & vtilité du Public, & tournent visage à l'honneur qui les regarde, & les oblige plustost à le desirer qu'à l'empescher: s'ils auoient le moindre sentiment du bien de la Patrie, & de l'honneur de la dignité qu'ils possèdent, ils n'au-



roient souffert qu'on les traduist au Tribunal de la Iustice du Parlement, qui est, *Iuris azilum legum præsidium morum institutorumque ara æqui bonique columen*, & auroient accordé les iustes demandes des demandeurs, qui sont appuyées de la raison, fortifiées des autoritez des excellens Personnages & il lustrez de plusieurs exemple, & qui n'ont d'autre fondement que la conseruation du bien Public, autre but que la veritable fin de la Politique, qui est la felicité & le bon-heur des Peuples, & qui d'habondant sont establies sur la Iustice, *Iustitia enim foras spectat totamque se ad alienas utilitates porrigit atque explicat*, comme dit Ciceron, *Lib. 2. de legib.* aussi n'en reuient-il rien aux demandeurs que la seule peine, comme aussi sur les Ordonnances & Edicts de nos Roys si sainctement instituez, si sagement resolus, si puissamment autorisez, si longuement executez, & qui estant verifiez n'ont besoin de discours pour se defendre, parce qu'ils se maintiennent par leur propre autorité; & dautant qu'ils procedent d'une puissance Souueraine qui a pouuoir de commander souuerainement & de se faire obeïr, & d'y vouloir adjoûter dauantage, ce seroit allumer vn flambeau pour éclairer le Soleil, & entreprendre de donner du lustre & de l'éclat à l'ormesme: Aussi l'autorité de la Cour paroistra dautant plus, qu'elle redonnera la premiere vigueur à des Loix mourante; Sa bonté, en reestablishant la justice dans son Throsne, sa preuoyance, en preuenant la perte & le débris d'un vaisseau qui contient en soy la meilleure partie des fortunes des Citoyens, qui est prest à faire naufrage, & duquel, *Iam stridunt funes curuatur arbor gubernacula gemunt*, le Pilote est dans l'indifference, les Nautonniers en discorde, Le prouier abandonne, la Boussolle est dereglee, & luy donnera une route fauorable & un port asseuré en reintegrant les demandeurs en ce Vaisseau mystique, c'est à dire en la fonction de leurs Charges & rendant au Conseil de Ville sa premiere splendeur, *Ratio restituet quod vitiosa consuetudo detraxit*, Il arriuera qu'à l'exemple de ce genereux Vlysse, les Pilotes de ce Vaisseau se feront lier au mats de leur Nauire, & boucheront les oreilles de leurs Compagnons avec de la cire, se ceindront de cette diuine Bande que Leucothée luy auoit baillée, qui le preseruoit du naufrage, & ainsi passeront hardiment en chantant cet agreable Ce-leusma, sans craindre le chant des Syrenes, n'aprehenderont point les Seylles, les Caribdes & les Samothuaces, c'est à dire qu'au moyen de la probité signifiée par cette Bande diuine, ils n'auront point d'oreilles pour escouter les promesses des Adjudicataires, Fermiers, Payeurs des Rentes & autres; la force desquelles est plus puissante que le chant des Syrenes & que les charmes de Circé, pour esbranler les consciences les plus nettes & les plus affermies.



*Quo magis, ô Patres rebus succurrite la sis,  
Et date tuta eius littora naufragio.*

Parces moyens & autres, que de droict la Cour qui semblable à cét Oracle qui expliquoit mieux les pensées que ceux mesmes qui luy faisoient des prieres & demandes, sçaura trop mieux suppléer, par sa prudence & equité accoustumée, les demandeurs concluent & demandent despens.